

Noticia for di Rotterdam

Gina Thijssen ganadora Festival Dande na Hulanda

ORANJESTAD (AAN) E festival di dande na Hulanda a tuma lugar dia 30 di December, y ayera DIARIO a ricibi e resul-

tado y potretan di e festival cu a tuma lugar den Clubgebouw ODEON na Rotterdam.

Pa e lectornan tin un idea con e

festival a tuma lugar, DIARIO a ricibi for di e organisador Ovi Henriquez e potretan di e evento y tambe sheet final di e par-

ticipantenan.

Segun Ovi Henriquez e festival a cuminsa exactamente 5 or di atardi, despues cu maestro di ceremonia Sr. Dochi Croes a yama e presente nan un bon bini na e prome lustro di festival di Dande, sigui pa Himno Nacional di Aruba y discurso di Ministro Plenipotenciario Ing. Señor Roland Lacle.

Un total di dos dama y siete caballero a participa den e festival compaña pa gruponan "Tipico Del Norte" y "Guadirikiri". Ora cu e prome dande a resona den e sala grandi di ODEON por a mira na e caranan di e publico un alegria cu lagrima na wowo di a tende nos dushi tradicion "Dande" Di cuminsamento te na e ultimo cantante e publico cu tabata den careda di 850 a aplaudi cada cantante pa nan actuacion sublime.

Huradonan; Alvin Toppenberg di Delft, Tirsí Vrolijk di Rotterdam, Eduardo Erasmus di Hellevoetsluis, Ramiro Boekhoudt di Veghel, Ludwina Booi di Den Haag. Sr. Martin Dania di Klundert (Noord Brabant) tabata Presidente di Jurado sin derecho di voto.

Cantantenan; Tutu Figaroa, Fechi Farro, Astrid Tromp, Marlon Maduro y Tico Croes, tur acompaña pa Tipico Del Norte. Anthony Kelly, Ito Kelly, Gina Thijssen y Tico Oduber, tur acompaña pa Grupo Wadirikiri.

E trofeonan a worde traha muy especial pa e ocasion di Prome Lustro di Dande, door di Silvester Werleman di S.G.W. Wood y Souvenir Shop Aruba, cual tanto e publico y e cantan-

tenan a keda masha impresionada di e manera cu e trofeonan a worde traha y cu ta unico na Hulanda, cu ki obra di man ta worde haci y como tal e publico y cantantenan a duna un fuerte aplauso pa Silvester "Buchi" Werleman pa e sublime y bunita obranan.

E cantantenan a haci un tremendo presentacion cu a trece e huradonan basta cerca di otro pa yega na e veredicto final. Den careda di 7 or di anochi, presidente di hurado Sr. Martin Dania a anuncia e ganadoman. Na di cinco lugar a keda Tutu Figaroa cu 178 punto. Na di cuatro lugar a keda Anthony Kelly cu 184 punto. Na di tres lugar a keda Ito Kelly cu 189 punto. Na di segundo lugar a keda Tico Oduber cu 192 punto. Ganadora absoluto di e festival a keda Gina Thijssen cu 197 punto.

No por keda sin menciona cu tur cuatro cantante cu Grupo Wadirikiri di Tico Oduber a compaña a clasifica di 1 pa 4.

Sr. Jimmy Oduber di Departamento di Cultura di Aruba Huis den presencia di e organisador Ovi Henriquez a entrega Sra. Gina Thijssen e trofeo ganador absoluto di e 5 festival di Dande na Rotterdam Hulanda.

Despues di entregamento di trofeonan e publico a pidi pa e ganador absoluto Sra. Gina Thijssen pa ripiti su dande ganador y asina e publico a aglomera dilanti di e podium y acompaña e cantante di manera fantastico cu lagrima na wowo di alegria cu e bunita coro; ay nobe, ay nobe.

